



Direcziun

Tgi surpiglia tge custs da las mesiras da la protecziun d'uffants?

Per il 1. da schaner 2022 è la surpigliada dals custs da las mesiras da la protecziun d'uffants en l'art. 63a LitCCS vegnida suttamessa ad ina revisiun cumpletta. Sin basa da las experientschas ch'èn vegnidas fatgas en il fratemp, ha la APUC ussa actualisà ses [fegl d'informaziun respectiv](#) che duai sustegnair las procuraturas ed ils procuraturs, ma er las vischnancas en lur lavur quotidiana. Qua sutvart vegn dada ina survista dals puncts ils pli impurtants.

Da nov surpiglian las **vischnancas** ils custs da las mesiras da la protecziun d'uffants staziunara ed er ambulanta al domicil civil da l'uffant. Sco mesiras da la protecziun d'uffants staziunara valan tut las collocaziuns d'uffants e da giuvenils en ina instituziun cun dimora sur notg. Tar las mesiras da la protecziun d'uffants ambulanta tutga per exempel in accompagnament pedagogic-social da famiglia u l'indemnizaziun per la gestiun d'ina curatella (detagls en il fegl d'informaziun menziunà qua survart). Custs da mesiras da la protecziun d'uffants pon resutar en trais differentas proceduras, numnadamain tras l'ordinaziun, tras la recumandaziun u tras il sustegn d'ina recumandaziun tras la APUC. En tuts trais cas examinescha la APUC mintgamai, sche la singula mesira è adattada e necessaria sco er sch'i dat eventualmain alternativs pli miaivlas.

Suenter la surpigliada dals custs da la vischnanca sto mintga genitur sa participar cun ina **contribuziun dals geniturs** separada. Davart questa obligaziun vegnan ils geniturs infurmads gia ordavant da la APUC. Sch'i resultan il medem mument custs da mesiras staziunaras ed ambulantas, sto mintga genitur pajar mo ina contribuziun dals geniturs. Questa contribuziun sa drizza bain tenor las Directivas da la COSAS, i na sa tracta en quest connex dentant da princip betg da la restituziun da custs da l'agid social, mabain dal pajament d'in dretg da mantegniment civil. Uschenavant sco pussaivel sto questa participaziun als custs vegnir fixada en moda consensuala tranter ils geniturs e la vischnanca e na po betg vegnir definida cun ina disposiziun unilateral suverana. Per quest intent ston ils geniturs communitgar lur relaziuns finanzialas. Sch'i sa mussa en quest connex ch'ils geniturs n'èn economicamain betg abels da pajar ina contribuziun, sto quella vegnir fixada a 10 francs. Mo questa contribuziun minimala po vegnir messa a quint a l'agid social.

Sch'i na reussescha betg da fixar ina contribuziun dals geniturs en moda consensuala, po la vischnanca far valair ses dretg **davant dretgira**, perquai che cun la surpigliada dals custs vegn il dretg da mantegniment, inclusiv il dretg da purtar plant appartegnent, transferì a la vischnanca. En quest connex sa preschenta la vischnanca envers ils geniturs sco creditura da dretg civil e betg forsa sco autoritad disponenta suverana. Per ils geniturs èsi dentant d'avantatg da fixar cun la vischnanca ina contribuziun dals geniturs en moda consensuala tenor las Directivas da la COSAS, perquai che la contribuziun da mantegniment da dretg civil fixada da la dretgira dastgass per il solit esser bier pli gronda. Ultra dals custs da process che smanatschan en cas ch'els perdan il process, vegn er questa circumstanza a motivar ils geniturs da collavurar per fixar ina contribuziun dals geniturs en moda consensuala.

La APUC recumonda a las vischnancas da stgaffir in process unitar per simplifitgar lur lavur en quest regard.

Cuira, il 1. da november 2022

Gregor Ott
Manader Servetsch giuridic